


醫
說
會
編



中喉
水
公
身
海
閱
之
印
丹
田

三
聖

醫說續編卷第七

痢門

治痢大法

崑山周恭輯

仲景治痢可溫者五法可下者十法或解表或利小便或待其自己區分易治難治極密但與瀉同立論不分學者當辯之初得時元氣未虛必推蕩之此通因通用之法稍久氣虛則不可也赤痢乃自小腸來屬血白痢自大腸來屬氣皆濕熱為本身熱挾外邪者小柴胡去人參後重者氣與積鬱墜在下之故當和氣兼升兼消之木香檳榔之類腹痛者有肺金之氣鬱在大腸之間以苦桔梗然後用治痢藥氣用氣藥血用血藥下

血多主食積與熱當涼血活血用當歸桃仁之類下

血又有風邪下陷宜升提之蓋風傷肝肝主血故也

腹痛者當用溫散藥如桂姜之屬以和之如有熱用黃

藥之類初下利腹痛不可用木參雖氣虛胃虛者皆不

可用噤口痢胃口熱甚故也黃連多煎終日呷之如

吐再呷但得一呷下咽便好大孔痛因熱流於下用

橫榔木香黃芩下如荳汁者濕也蓋脾胃為水穀之

海無物不受常兼四藏故如五色之相染當先通利

此迎而奪之之義如虛者宜審之心法

下痢膿血

洛陽一女子年四十六七耽飲無度多食魚蟹攝理

之方蔑如也後以飲啖過度蓄毒在藏日夜二三十

利大便與膿血雜下大腸連肛門痛不堪任醫以止

血痢藥不效又以腸風藥則益甚蓋腸風有血而無

膿凡如此已半年餘氣血漸弱食漸減肌肉漸瘦稍

服熱藥則腹愈痛血愈下稍服涼藥即泄注氣羸粥

愈減服溫平藥則病不知如此將期歲醫告技窮乘

命待盡或有人教服人參散病家亦不敢主當謾與

服之纔一服知二服減三服膿血皆定自此不十服

遂愈後問其方云治大腸風虛飲酒過度挾熱下利

膿血疼痛多日不差樗根白皮一兩人參一兩為末

每用二錢七空心以溫酒調服如不飲酒以溫米飲

代忌油膩濕麪熱毒甜物雞豬魚腥等衍義

痢疾脫肛

人有小女患痢脫肛叔權傳得一方用草茶葉一握姜七片令煎服而愈然不知其方所自來也後閱蘇文始知生姜咬咀煎茶乃東坡治文潞痢方也資生經

痢脉宜沉弱

曾有一婦人病痢疾越四十日服諸藥不愈召僕診之六脉沉弱大凡下痢之脉宜沉宜弱但服十全大補湯姜棗煎成加白蜜半匙再煎數沸服之愈良方

似痢非痢

又一婦人泄瀉不止似痢非痢似血非血其色如濁酒召予診之則六脉沉絕衆醫用熱藥及丹藥服之則發煩悶僕先用敗毒散加陳米煎次用胃風湯加粟米煎愈

痢疾咳逆

一人痢疾咳逆不止六脉沉弱諸醫用藥灼艾皆無效僕投退陰散兩服愈又嘗治許主簿痢疾咳逆不止服諸藥無效遂灸期門穴不三壯而愈見上

食甜瓜偶愈痢

一男子病膿血惡痢痛不可忍忽見水浸甜瓜心酷喜之連皮食數枚膿血皆已人言下痢無正形是何言也人止知痢是虛冷溫之燥之澁之截之此外無術矣豈知風暑火濕燥寒六者皆能為痢此水浸甜瓜所以效也儒門事親

脫肛後作痢

癸卯冬白樞判家一老僕面塵脫色神氣特弱病脫

肛日久服藥未驗復下赤白膿痢作裏急後重白多赤少不任其苦以求治東垣曰此非肉食膏粱必多蔬食或飲食不節天氣雖寒衣蓋猶薄不禁而腸頭脫下者寒也真氣不禁形質不收乃血滑脫也此乃寒滑氣泄不固故形質下脫也當以澁去其脫而除其滑微酸之氣上收以大熱之劑除寒補陽以補氣之藥升陽益氣以訶子皮散主之

秘藏

瘧痢併作為陰陽皆虛

至元己亥廉臺王千戶年四十有五領兵鎮漣水此地卑濕因勞役過度飲食失節至秋深瘧痢併作月餘不愈飲食全減形容羸瘦乘馬輻以歸時已仲冬請予治之具陳其由診得脉弦細而微如蛛絲身體

沉重手足寒逆時復麻痺皮膚痲疥如癘風之狀無力以動心腹痞滿嘔逆不止此皆寒濕為病久淹真氣衰弱形氣不足病氣亦不足陰陽皆不足也鍼經云陰陽皆虛鍼所不為灸之所宜內經云損者益之勞者溫之十劑云補可去弱先以理中湯加附子溫養脾胃散寒濕澁可去脫養臟湯加附子固腸胃止瀉利仍灸諸穴以併除之經云府會太倉即中脘也先灸五七壯以溫養脾胃之氣進美飲食次灸氣海百壯生發元氣滋榮百脉充實肌肉復灸足三里胃之合也三七壯引陽氣下交陰分亦助胃氣後灸陽輔二七壯接續陽氣令足脛溫暖散清濕之邪迨月餘病氣去漸平復今累遷侍衛親軍都指揮使精神

不減壯年

寶鑑

傷白酒下痢

有老人年七十面白脉弦數獨胃脉沉滑因飲白酒作痢下血痰水膿腹痛小便不利裏急後重以人參白朮爲君甘草滑石檳榔木香蒼朮最少煎下保和丸二十五丸第二日證減獨小便不利只以益元散服之效

小兒血痢作食積治

一小兒八歲下痢純血作食積治蒼朮白朮黃芩白芍藥滑石白茯苓甘草陳皮炒神麴煎湯下保和丸痢後血少腹痛

一婦人痢後血少腹痛用川芎當歸陳皮芍藥右煎

調六一散服之

並心法

滯下發吃

丹溪云趙立道年近五十質弱而多怒七月炎暑大饑索飯其家不能急具因大怒兩日後得滯下病口渴自以冷水調生蜜飲之甚快滯下亦漸緩如此者五七日召予視脉稍大不數遂令止蜜水渴時但煎人參白朮湯調益元散與之滯下亦漸收七八日後覺倦甚發吃予知其久下而陰虛也令守前藥然滯下尚未止又以鍊蜜飲之如此者三日吃猶未止衆皆尤藥之未當將以姜附飲之予曰補藥效遲附子非補陰者服之必死衆曰冷水飲多得無寒乎予曰炎暑如此飲涼非寒勿多疑待藥力到當自止又四

日而吃止滯下亦安

又

陳宅仁年近七十厚味人也有久喘病而作止不常
新秋患滯下食太減至五七日後吃作予視脉皆大
豁衆以爲難予曰形瘦者尚可爲以人參白朮湯下
大補丸以補血至七日而安此二人者虛之爲也

痢而健食宜禁

周其姓者形色俱實患痢善食而易饑大嚼不擇者
五日矣予責之曰病中當調補自養豈可滋味戕賊
遂教之只用熟蘿蔔喫粥且少與調治半月安

並餘論

滯下爲憂慮所致

予從叔年踰五十夏間患滯下病腹微痛所下褐色

後重頻併穀食大減時有微熱察其脉皆弦而澁似
數而稍長都喜不甚浮大兩手相等視其神氣大減
予曰此滯下憂慮所致心血虧脾氣弱耳遂以參朮
爲君當歸陳皮爲臣川芎炒芍藥茯苓爲佐使時暄
熱甚加少黃連兩月而安

滯下爲醉飽後食所致

梅長官年三十餘奉養厚者夏秋間患滯下腹大痛
有人教服單煮乾薑與一貼則痛定少頃又作又與
之定由是服乾姜至三觔一日視之左脉弦而稍大
似數右脉弦而大稍減亦似數重取之似緊予曰此
必醉飽後喫寒涼太過當作虛寒治之因其多服乾
薑遂教用四物湯去地黃加人參白朮陳皮酒紅花

茯苓桃仁煎入生姜汁飲之至一月而安

陰虛下利

金氏婦年近四十秋初尚熱患滯下腹但隱痛夜重於晝全不得睡食亦稍減口乾不飲已服治利靈砂二貼矣予視之兩手脈皆澁且不勻神思倦甚飲食全減因與四物湯倍加白朮為君以陳皮佐之與十數貼而安已上併此三病若因其逼迫而用峻劑豈不悞人並發

養胃氣治痢下

葉先生患滯下後甚重正合承氣湯證予曰氣口虛形雖實而面黃稍白此必平昔食過飽而傷胃也寧忍一兩日辛苦遂與人參白朮陳皮芍藥等補劑十

餘貼三日後胃氣稍克與承氣湯兩貼而安苟不先補完胃氣之傷而遽行承氣吾恐病完之後寧免瘦

憊乎餘論

按葉先生名儀嘗與丹溪俱從白雲許先生學其記病云歲癸酉秋八月既望予病滯下痛作絕不食飲既而困憊臥于牀至不能溷乃以衽席及薦闕其中而聽其自下焉時朱彥脩氏客城中以友生之好日過視予飲予藥予病不省何藥但口服而病日增朋遊知醫者譁然竊議曰藥以去疾服藥而病增何也彥脩氏聞之曰嘻此豈諸賢所能知哉淡旬病滋益甚痰窒咽如絮呻吟聲達保伍亘晝夜私自虞此疾不可為也夜與二子訣二子

哭道路相傳謂予死矣彥脩氏聞之曰吁此必傳者之妄也翼日天甫明來視予脉煮小承氣湯飲予藥下咽覺所苦者自上下凡一再行意冷然如是一日而問粥又如是一日而問肉又如是一日而語言如常時朋游竊議者來過彥脩在焉或起而問曰先生之治此證異他人之治幸教之彥脩氏曰此證揆厥所由以其人日與啾啾者接言恒多多言者中氣虛虛用補又其人務竟已事恒失之饑而傷於飽傷於飽其流為積積之久為此證夫以滯下之證謂宜去其舊而新是圖而我投之以補劑渠用是安得不日以劇然非決旬之補則誰敢下之於一朝哉彼務止之者其積畱中固常

常者之術有如務去積而不知中氣虛當以補為先者又豈吾之治法哉雖然補未至而下則病者未能當下劑補已至而弗下則病者又不能當藥之補匪急匪徐其間不能以髮噫微乎哉諸賢臨此證幸察識而慎焉衆乃歛衽而服且謝曰謹受

教本集

兩人同痢生死斷

鄧千戶二婢子八月間同患滯下滑伯仁至診視一婢脉鼓急大熱喘悶曰此必死一婢脉洪大而虛軟微熱而小便利曰此可治即下之已而調以苦溫苦堅之劑果一死一瘡

白雲集

噤口痢方

陳慶長知縣名祖永云頃守官南康其子年十歲患噤口痢水漿不入者數日惟能進藥同官家有方書載一治法試用之一服而痢稍疎三服遂索粥飲頓食半盞許自是痢止而安其法用乾山藥一半炒黃色一半生用研為細末米飲調下

血痢

王是齋云張叔潛秘書知劔州時其閤中病血痢一醫者用合成平胃散秤一兩入川續斷末二錢半拌勻每服二錢水一盞煎至七分服愈紹熙壬子會稽時行痢疾叔潛之子為人說服之亦驗小兒病親曾服作效

椿子治痢

泊宅編云姚祐自殿監遷八座母夫人病痢諸藥不效令李昂筮軌革有真人指靈草之語一日登對上訝其色悴具以實奏詔賜一散子數服而愈仍喻只妙椿子熟末之飲下余檢本草椿莢主大便下血今處處有之夏中生莢樗之有花者無莢有莢者無花常生臭樗上未見椿上有莢者然世俗不辯椿樗之異故俗中名此為椿莢其實樗莢耳注云樗皮主疳痢日華子云樗皮溫無毒止瀉及腸風入藥時用蜜炙藥性論云樗白皮使味苦微熱無毒能治赤白痢腸滑痔疾瀉血不住取白皮一握倉粳米五十粒葱白一握甘草三寸炙豉兩合以水一升煮取半升頓服之小兒量大小服枝葉與皮功用皆同

並百乙方

妊娠下痢

妊娠下痢赤白絞刺疼痛服雞黃散用雞子一箇烏者尤妙就頭作竅傾出清留黃用黃丹一錢入前雞子殼內打令黃勻以厚紙裹黃泥固濟火上煨取焙乾為末服二錢米飲調下一服愈者是男兩服愈者是女奇效得效方

泄瀉門

論泄瀉分治用藥法

世俗類用澀藥治痢與瀉若積久而虛者或可用之而初得者必變他證為禍不小殊不知多因於濕惟分利小水最是長策濕者燥濕宜滲泄之四苓散等木甚者二氣虛者用人參白朮白朮俱炒芍藥炒升麻火者宜伐火利小

水用

黃芩木通入四苓散

痰者宜豁之用

海石青黛黃芩神麩作糊丸或用吐法

已上諸藥或丸或散服之食積者宜消導疎滌之神麩

或大黃等

水多者仍用

五苓散

脾泄者當大補脾氣而健運

之常陰虛而腎不能司禁固之權者峻補其腎痰積在肺致其所合大腸之氣不固者湧出上焦之痰則肺氣降下而大腸之虛自復憂思入脾氣結而不能升舉陷入下焦而泄瀉者開其鬱結補其脾胃而使穀氣升發也戴原理云凡瀉水而腹不痛者是濕飲食入胃不住完穀不化者是氣虛腹痛瀉水腹鳴痛一陣瀉一陣者是火或瀉或不瀉或多或少是痰腹痛甚而瀉瀉後痛減者是食積心法

腎泄

一親母五更初必溏利一次者數月有人云此名腎泄腎感陰氣而然服五味子散愈其方用五味子二兩吳茱萸半兩細粒綠色者並炒香熟為末每服二錢陳米飲下

肝腎虛病泄

趙府博與輒婺州人也宜人病泄瀉不止如附子木香呵子肉荳蔻龍骨等藥及諸丹服之皆無效陳良甫診之云是肝腎脉虛弱此肝腎虛也府博云其說見在何經良甫曰諸方論泄利止是言脾胃病不過謂風冷濕毒之所侵入及飲食傷滯遇腸虛則泄利而不知肝腎氣虛亦能為泄利古書所載甚明不可不辯經曰泄利前後不止腎虛也又諸厥固泄皆屬

于下下謂下焦肝腎之氣分也門戶東要肝之氣也守司於下腎之氣也肝氣厥而上行不能禁固而泄利腎為胃關門戶不要故倉廩不藏也若病泄利其源或出於此而專以脾胃藥治之則謬固千里矣遂服木香散數服而愈

良方

灸溏洩

舊傳有人年老而顏如童子者蓋每歲以鼠糞灸臍中神闕穴一壯故也予嘗久患溏利一夕灸三七壯則次日不如廁連數夕灸則數日不如廁足見經言主泄利不止之驗也又予年踰壯覺左手足無力偶灸此而愈

資生經

熱氣在下則生飡泄

昔人有病此者腹中雷鳴泄注米穀不分小便澀滯皆曰脾胃虛寒故耳用荳蔻烏梅鶯粟乾薑附子曾無一效中脘臍下灸已數千燥熱轉甚小溲涸竭瘦削無力飲食減少命子和治之以謂陰陽應象論曰熱氣在下水穀不分化生飡泄寒氣在上則生臏脹而氣不散者何也陰靜而陽動故也診其兩手脉息俱浮大而長身表微熱用桂枝麻黃湯以姜棗煎大劑連進三服汗出終日至旦而愈次以胃風湯和平藏府調養陰陽食進病愈

洞泄寒中證

昔睢陽府判趙顯之病虛羸泄瀉褐色乃洞泄寒中證也每聞大黃氣味即泄注子和診之兩手脉沉而

軟今灸分水穴一百餘壯次服桂苓甘露飲胃風湯白朮丸等藥不數日而愈

口瘡滑泄

相臺監酒岳成之病虛滑泄日夜不止腸鳴而口瘡俗呼為心勞口瘡三年不愈子和以長流水同薑棗煎五苓散五七錢空心使服之以治其下以宣黃連白茯苓去皮二味各等分為末以白麵糊為丸食後溫水下三五十九以治其上百日而愈

奇治洞泄

子和云昔聞山東楊先生者治府主洞泄不已楊初未對病人與衆人談日月星辰纏度及風雲雷雨之變自辰至未而病者聽之而忘其圍楊嘗曰治洞泄

不已之人先問其所慧之事好棋者與之棋好樂者與之笙笛勿輟

殮泄

趙明之米穀不消腹作雷鳴自五月至六月不愈諸醫以爲脾受大寒故併與聖散子荳蔻丸雖止一二日藥力盡而復作諸醫不知藥之非反責明之不思口戴人至而笑曰春傷於風夏必殮泄殮泄者米穀不化而直過下出也又曰米穀不化熱氣在下久風入中中者脾胃也風屬甲乙脾胃屬戊巳甲乙能克戊巳腸中有風故鳴經曰歲木太過風氣流行脾土受邪民病殮泄診其兩手脉皆浮數爲病在表也可汗之直斷曰風隨汗出以火二盆暗置牀下不令病人見火恐憎其熱給之入室使服涌劑以麻黃投之乃閉其戶從外鎖之汗出如洗待一時許開戶滅火一半溲史汗止泄亦止

滑泄乾嘔屬少陽

麻先生妻當七月間病藏府滑泄以去濕降火之藥治之少愈後腹脹及乳痛狀如吹乳頭重壯熱面如渥丹寒熱往來嗌乾嘔逆胸脇痛不能轉側耳鳴食不可下又復瀉先生欲瀉其火藏府已滑泄數日矣欲以溫劑止利又奈上焦已熱實不得其法使人就諸葛寺禮請戴人比及戴人至因檢劉河間方惟益元散正對此證能降火解表止渴利小溲定利安神以青黛薄苛末調二升置之枕右使作數次服之夜

半偏身出冷汗如洗元覺足冷如冰至此足大暖頭
頓輕肌涼痛減嘔定利止及戴人至先生告之已解
戴人曰益元固宜此是少陽證也能使人寒熱偏劇
他證縱有寒熱亦不至甚既熱而有利不欲再下何
不以黃連解毒湯服之乃令診脉戴人曰娘子病來
必常欲痛哭爲快否婦曰實欲如此予亦不知所謂
戴人曰少陽相火凌爍肺金金受屈制無所投告肺
主悲但欲痛哭而爲快也麻先生曰余家諸親無不
敬服脉初洪數有力自服益元散後已平又聞戴人
之言便以當歸芍藥以解毒湯中味數服之大瘥矣
痰積泄瀉

古鄖一講僧病泄瀉數年丁香荳蔻乾薑附子官桂

烏梅等燥藥燔鍼燒臍熨腕無有闕者一日發昏不
省檀那贈紙者盈門戴人診兩手脉沉而有力脉訣
云下利微小者生脉洪浮大者難瘥以瓜蒂散涌之
出寒痰數升又以無憂散泄其虛中之積及燥糞僅
盈斗次以白朮調中湯五苓散益元散調理數日僧
已起矣非術精識明誰敢負荷如此

洞泄爲謀慮所致

一講僧顯德明初聞家遭兵革心氣不足又爲寇賊
所驚得藏府不調後入京不伏水土又得心氣以至
危篤前後三年八仙丸鹿茸丸燒肝散皆服之不效
乃求藥于戴人戴人曰此洞泄也以謀慮久不決而
成肝主謀慮甚則乘脾久思則脾濕下流乃上涌痰

半盆末後有血數點肝藏血故也又以舟車丸瀆川散下數行仍使澡浴出汗自爾日勝一日常以胃風湯白朮散調養之一月而強實復故矣

瀉利惡寒

東門一男子病瀉利不止腹鳴如雷不敢冷坐坐則下注如傾諸醫例斷為寒證乾薑官桂丁香豈菟之屬枯礬龍骨皆服之矣何鍼不燔何艾不炷遷延將二十載一日問于戴人戴人曰兩手寸脉皆滑余不以爲寒然其所以寒者水也以茶調散湧寒水五七升無憂散泄積水數十行乃通因通用之法也次以五苓散淡劑滲泄利之又以甘露散止渴不數日而冷食寒飲皆如故此法王啓玄稔言之矣奈無人用

之哉

不忌口愈泄

一男子病泄十餘年豈菟阿膠訶子龍骨烏梅枯礬皆用之矣中腕臍下三里歲歲灸之皮肉皴槁神昏足腫泄如泔水日夜無度戴人診其脉兩手沉且微曰生也病人忽曰羊肝生可食乎戴人應聲曰羊肝止泄尤宜服病人悅而食一小盞許可以漿粥送之病人飲粥數口幾半升續又食羊肝生一盞許次日泄減六分如此月餘而安此皆忌口太過之罪也並儒

門事
親

按東垣云雖立食禁法若可食之物一切禁之則胃氣失所養也亦當從權而食之以滋胃也

體重泄瀉

予病脾胃久衰視聽半失此陰氣乘陽而上氣短精神不足且脉弦皆陽氣衰弱伏匿於陰中故耳癸卯歲六七月間霖雨陰寒踰月不止時人多病泄利乃濕多成五泄故也一日體重肢節疼痛大便泄併下者三而小便秘塞默思內經有云在下者引而竭之是先利小便也又云諸瀉而小便不利者先分利之又云治濕不利小便非其治也法當利小便必用淡滲之劑以利之是其法也噫聖人之法雖布在方策其不盡者可以意求今客邪寒濕之勝自外入裏而甚暴若以淡滲之劑利之病雖即已是降之又降復益其陰而重竭其陽則陽氣愈削而精神愈短陰重煎至一盞熱服乃愈大法云寒濕之勝助風以平之又曰下者舉之此得陽氣升騰故愈是因曲而為之直也夫聖人之法可以類推舉一而知百矣明發

完穀不化灸之不發

國信副使覃郎中年四十九歲元至正丙寅春病臍腹冷疼完穀不化足脘寒而逆皮膚不仁精神困弱診其脉沉細而微遂投以大熱甘辛之劑及灸氣海百壯三里二穴各三七壯陽輔各二七壯三日後以葱熨灸瘡皆不發復灸前穴依前壯數亦不發十日後瘡亦更不作膿瘡口皆乾癸丑歲予隨朝承應冬

屯於瓜忽都地面學鍼於寶子聲先生因詢穴諭曰
凡用鍼者氣不至而不效灸之亦不發大抵本氣空
虛不能作膿失其所養故也更加不慎邪氣加之病
必不退異日因語鍼灸科忽教授亦以爲然戊辰春
副使除益都府判到任未幾時風疾半身麻木自汗
惡風妄喜笑又多健忘語言微澀醫以續命湯復發
其汗津液重竭其證愈甚因求醫還家日久神氣昏
憤形容羸瘦飲食無味便溺遺失扶而後起屢易醫
藥皆不能效因思內經云陽氣者若天與日失其所
則折壽而不彰今因此病而知子聲先生之言矣或
曰副使肥甘足於口輕暖足於體使今足於前所言
無不如意君言失其所養何也予曰汝言所養養口

體者也予論所養養性命者也且覃氏壯年得志不
知所養之正務快於心精神耗散血氣空虛因致此
疾靈樞云人年十歲五藏始定血氣已通其氣在下
故好走二十歲血氣始盛肌肉方長故好趨三十歲
五藏大定肌肉堅血氣盛滿故好步四十歲五藏六
府十二經脉皆大盛以平定腠理始踈華容頹落髮
頗斑白平盛不搖故好坐五十歲肝氣始衰肝葉始
薄膽汁始減目始不明六十歲心氣始衰善憂悲血
氣懈惰故好臥七十歲脾氣始衰皮膚已枯八十歲
肺氣衰魂魄散離故言善誤九十歲腎氣焦藏枯經
脉空虛百歲五藏皆虛神氣皆去形骸獨居而終矣
蓋精神有限嗜慾無窮輕喪性命一失難復其覃氏

之謂歟

自利完穀斷寒治驗

征南副元帥大忒木兒年六旬有八戊午秋征南予從之過揚州十里時仲冬病自利完穀不化臍腹冷疼足斷寒以手搔之不知痛痒燒石以溫之亦不得暖予診之脉沉細而微予思之年高氣弱深入敵境軍事煩冗朝暮形寒飲食失節多飲乳酪履于卑濕陽不能外固由是清濕襲虛病起於下故斷寒而逆內經云感於寒而受病微則為咳盛則為泄為痛此寒濕相合而為病也法當急退寒濕之邪峻補其陽非灸不能病已先以大艾炷於氣海灸百壯補下焦陽虛次灸三里二穴各三七壯治胛寒而逆且接引

陽氣下行又灸三陰交二穴以散足受寒濕之邪遂處方云寒淫所勝治以辛熱濕淫于外平以苦熱以苦發之以附子大辛熱助陽退陰溫經散寒故以為君乾姜官桂大熱辛甘亦除寒濕白朮半夏苦辛溫而燥脾濕故以為臣人參草豆蔻炙甘草甘辛大溫溫中益氣生姜大辛溫能散清濕之邪葱白辛溫以通上焦陽氣故以為佐又云補下治下制以急急則氣味厚故大作劑服之不數服瀉止痛減足胛漸溫調其飲食逾十日平復明年秋過襄陽值霖雨閱旬餘前證復作依前灸添陽輔各灸三七壯再以前藥投之數服良愈方名加減白通湯

並寶鑑

瀉利為大氣下脫

黃子厚者江西人也精醫術鄰郡一富翁病泄瀉彌年禮致子厚診療浹旬莫效子厚曰予未得其說求歸一日讀易至乾卦天行健朱子有曰天之氣運轉不息故閣得地在中間如人弄椀珠只運動不住故在空中不墜少有息則墜矣因悟向者富翁之病乃氣不能舉為下脫也又作字持水滴吸水初以大指按滴上竅則水滿筒放其按則水下溜無餘乃豁然悟曰吾可治翁證矣即治裝往翁家驚喜至即為治艾灸百會穴未三四十壯泄瀉止矣

白雲集

按諸經中無百會治泄瀉止云治小兒脫肛蓋脫字是墜落之名元氣不舉之義也陰陽書云人身有四穴最急應四百四病皆能治之百會蓋其一

也夫百會屬督脉居頂巔為天之中是主一身之氣也元氣下脫脾胃無憑所以泄瀉是謂閣不得地經云下者上之所以灸百會愈者使天之氣復健行而脾土得以憑之耳銅人經謂百會灸脫肛其義一也又名為天滿是天之氣不可不滿也子厚讀易不思內經黃帝問岐伯曰地之為下否乎岐伯曰地為人之下太虛之中者也帝曰憑乎岐伯曰大氣舉之也此言何異於易孫思邈曰不讀易不足以言太醫信不誣矣

積痰成瀉

丹溪云叔祖年七十稟甚壯形甚瘦夏末患泄利至秋深百方不效病雖久而神不悴小便澀少而不赤

兩手脉俱澀而頗弦自言膈微悶食亦減此必多年
沉積僻在腸胃詢其平生喜食何物曰我喜食鯉魚
三年無一日缺予曰積痰在肺肺為大腸之藏宜太
腸之本不固也當與澄其源則流自清以茱萸青葱
陳皮蘆苜根姜煎濃湯和以砂糖飲一枕許自以指
探喉中至半時吐痰半升許如膠是夜減半次早又
飲又吐痰半升而利止又與平胃散加白朮黃連旬
日十餘貼而安

治法

下利完穀由肝風傳脾所致

帥府從事帖木失爾病下利完穀衆醫咸謂洞泄寒
中日服四逆理中葷彌劇呂翁診其脉兩尺寸俱弦
長右關浮於左關一倍其目外眦如草滋蓋知肝風
傳脾因成飡泄非藏寒所致飲以小續命湯損麻黃
加朮三五升利止續命非止利藥飲不終劑而利止
者以從本治故也

飡泄為驚風所致

御史王彥芳內子病飡泄彌年衆醫皆謂休息痢瘵
以苦堅辛燥之劑弗效呂翁診其脉當秋半雙弦而
浮即告之曰夫人之病蓋由驚風非飲食勞倦所致
也以肝主驚故虛風自甚因乘脾而成泄當金氣正
隆尚爾至明春則病將益加法當平木太過扶土之
不及其泄自止夫人曰儂寓南閩時平章燕公以銅
符密授御史俾出入自如吾兒關關玩弄久之遂失
去平章一日追符甚急儂心懼焉由是疾作公指為

驚風信然乃用黃犢而純切黃牛黑唇也牛肝和以攻風健脾

之劑服之踰月泄止

久瀉見風輒什

南臺治書郭公久患泄瀉惡寒見風輒什日臥密室以擅蒙其首熾炭助之出語呶呶如嬰見諸醫皆作沉寒痼冷治屢進丹附不時驗項彥章診其脉告曰此脾伏火邪濕熱下流非寒也法當升陽散火以逐其濕乃煮升麻柴胡澤瀉羌活等劑而繼以神芎丸郭曰予苦久泄今復利之恐非治也彥章曰公之六脉浮濡而弱且微數濡者濕也數者脾有伏火也病由濕熱而且加之以熱劑非苦寒逐之不可法曰通因通用吾有所試矣頃之利如木屑者五四出即蒙

首之蘊去次去熾炭病旋已並九靈山房集

洞泄厥逆胃脘痛

方明禮內人盛暑病洞泄厥逆惡寒胃脘當心而痛自腹引脇轉為滯下嘔噦不入人以中暑霍亂療之益劇滑伯仁診其脉三部俱微短沉弱不應呼吸曰此陰寒極矣不亟溫之則無生理內經雖曰用熱遠熱又曰有假其氣則無禁也於是以薑附溫劑三四進間以丹藥脉稍有力厥逆漸退更服薑附七日衆證悉去遂以丸藥除其滯下而藏府自安矣白雲集

嘔吐門

嘔吐分上中下三脘

趙良仁曰夫陰陽氣血隨處有定分獨脾胃得之則

法天地人而三才之道備故冒有上中下三脘上脘
法天爲陽下脘法地爲陰中脘法氣交之分陽清而
陰濁故陽所司者氣陰所司者血然陽中亦有陰陰
中亦有陽於是上脘氣多血少則體乾道之變化動
也下脘血多氣少則體坤道之資生靜也中脘氣血
相半故運上下動靜升降之氣行由是物之入胃又
從其類聚水飲者物之清穀食者物之濁然清中有
濁濁中有清故飲之清者必先上輸於司氣之肺而
後四布爲津爲液清中之濁者則下輸膀胱爲便溺
出焉食之清者亦必先滯精於司血之心肝以養筋
骨經脉更化榮衛流注百骸濁之濁者則自下脘變
糟粕傳送下大腸出焉若邪在上脘之陽則氣停氣

停則水積故飲之清濁溷亂則穀化爲痰爲飲爲涎
爲唾變而成嘔邪在下脘之陰則血滯血滯則穀不
消故食之清濁不分而爲噎塞爲痞滿爲脹變
而成吐邪在中脘之氣交者盡有二脘之病是故嘔
從氣病法天之陽動而有聲與食俱出猶雷震必雨
注也吐從血病法地之陰靜而無聲與食俱出象萬
物之吐出于地也氣血俱病法陰陽之氣交則嘔吐
並作飲食皆出然在上脘非不吐食也設陽中之陰
亦病則食入即吐不得納于胃也非若中脘之食已
而後吐下脘之食久而方出其下脘非不嘔也設陰
中之陽亦病則吐與嘔齊作然嘔少於吐不若上脘
之嘔多於吐也

藥要
或問

論嘔吐所因

劉河間論嘔者火氣炎上此特一端耳大抵嘔吐噦當分氣血多少而治有痰隔中焦食不得下者有氣逆者有寒氣鬱於胃中者有食滯心肺之分不得下而反出者然胃中有火與痰而致嘔者多又有久病嘔者此胃虛不納穀也宜生薑人參黃芪白朮香附之類凡病人欲吐者切不可下之逆故也治法

病後嘔吐

胃熱嘔吐者手足心熱政和中一宗人病傷寒得汗身涼數日忽嘔吐藥與飲食俱不下醫者皆進丁香藿香滑石等藥下咽即吐予曰此證汗後餘熱留胃脘孫兆竹茹湯正相當爾亟治藥與之即時愈方良

關格

有婦人病吐逆大小便不通煩亂四肢冷漸無脈息一日半與大承氣湯兩劑至夜半漸得大便通脈漸生翌日乃安此關格之病極難治醫者當謹審也經曰關則吐逆格則小便不通如此亦有不得大便秘

衍義

憂抑致嘔逆

栢亭王論夫本因喪子憂抑不思飲食醫者不察以為胃冷血寒之劑盡用病變嘔逆而瘦求治于戴人一再湧泄而愈歸家忘其禁忌病復作大小便俱秘臍腹撮痛嘔吐不食十日大小便不通十有三日復問戴人戴人曰令先食葵羹菠菱菜猪羊血以潤燥

開結次與導飲丸二百餘粒大下結糞又令恣意飲
冰水數升繼搜風丸桂苓白朮散以調之食後服導
飲丸三十餘粒不數日前後皆通痛止嘔定食進戴
人臨別又畱潤腸丸以防復結又畱滌腸散大便秘
則用之凡服大黃牽牛四十餘日方瘳論夫因嘆曰
向使又服向日熱藥已非今日人矣一僧問戴人云
腸者暢也不暢何以此一句儘多儒門事親
按子和之醫大抵此法行之耳丹溪云凡病人欲
吐者切不可下之逆故也縱使二便復秘可行踈
通亦中病而止然後養其氣血潤其腸胃庶乎標
本之治何乃羸瘠之人服大黃牽牛四十餘日方
瘳豈理也哉違聖人之法以欺後世恐非子和之

筆也孟子謂盡信書不如無書學者詳之

噦爲胃熱所致

餘姚州守郭文煜病噦十餘日州之以醫名者畢至
悉以附子丁香等劑療之益甚呂元膺切其脉陽明
大而長右口之陽數而躁因告之曰公之噦即古之
欬逆由胃熱而致或者失察而反助其熱悞矣飲以
竹茹湯未終劑噦止

嗜飲燒酒病嘔吐

建康萬夫長廉君病項彥章診之曰病當噦作聲食
入即出而後澣不利廉曰然予平生所嗜獨燒酒彥
章即治葛花解醒加黃芩飲二升而勢減衆醫以藥
性過寒交沮之彥章既論不協辭去即嘆曰實實而

虛虛過二月當入鬼錄矣果如其言彥章所以知廉之病者切其脉細數而且滑諸數為熱滑為嘔為胃有物酒性大毒大熱而反以熱劑加之是火其火也且洩秘為陽結今皆反治故二月死也

並九靈山房集

嘔逆煩懣

夏思忠病胸膈脹痛心怔忡嘔逆煩懣不食情思惘惘不暫安目眈眈無所睹滑伯仁視之六脉皆結澁不調無復參伍怪之既徐而察之其人機深憂思太過加之脾胃內傷積為痰涎鬱于上膈然也素問云思則氣結又云陰氣者靜則神藏躁則消亡飲食自倍腸胃乃傷其是之謂乎為製祛順丸服之旋服平和思忠曰吾疾諸治罔效始以為天下無藥茲服君

祛順丸乃知天下有藥矣

白雲集

霍亂門

霍亂治法

見成吐瀉不徹者還用吐提其氣起二陳湯加減亦可或樟木濃煎湯吐亦可霍亂脉多伏或絕若轉筋不住男子以手挽其陰女子以手牽乳近兩邊此千金妙法也 乾霍亂大法吐與發汗亦不妨此係內有所傷外為邪氣所逼有用吐法者則兼發散之義有用溫藥解散者其法不用涼藥以二陳湯加解散藥川芎蒼朮防風白芷等劑以鹽湯吐之尤妙又法就脚腕橫紋中間有紫處刺出血即安此名委中穴也大抵非因鬼邪皆是飲食此前人之確論蓋由陽

不升陰不降乖隔而成霍亂切不可與米湯飲立死

治法

霍亂吐瀉生死說

泰和間予親見陳下廣濟禪院其主僧病霍亂一方士用附子一枚及兩者乾薑一兩炮水一椀同煎放冷服服訖嘔血而死頃合流鎮李彥甫中夜忽作吐瀉自取理中丸而服之醫者至以為有食積用巴豆下之三五丸藥亦不動至明而死可不哀哉遂平李仲安携一僕一佃客至郟城夜宿邵輔之書齋中是夜僕逃仲安覺其時也騎馬與佃客往臨穎急追之時七月天大熱炎風如箭埃塵亘天至辰時而還曾不及三時往返百二十里既不獲其人復宿於邵氏

齋忽夜間聞呻呼之聲但言救我不知其誰也執火尋之乃仲安之佃客也上吐下瀉目上視而不下胸脇痛不可動搖口欠而脫白四肢厥冷此正風濕暈三者俱合之證也其壻曾聞子和言乃取六一散以新汲水剉生薑而調之頓服半升其人復吐乃再調半升而令徐服之良久方息至明又飲數服遂能調養三日平復而去嗚呼若此三人其生死豈不如反掌哉彼世醫往往謂六一散治得甚病此無學之輩也可勝恨哉

儒門事親

中暑霍亂

提學侍其公年七十九歲至元丙寅六月初四日中暑毒霍亂吐利昏冒終日不省人事時夜方半請予

治之診其脉洪大而有力一息七八至頭熱如火足
寒如冰半身不遂牙關緊急因思內經五亂篇中云
清氣在陰濁氣在陽營氣順脉胃氣逆行亂於胸中
是謂大惋云云亂於腸胃則為霍亂於是霍亂之名
自此而生蓋因年高氣弱不任暑氣陽不維陰則瀉
陰不維陽則吐陰陽不相維則既吐且瀉矣前賢見
寒多以理中丸熱多以五苓散為定法治之今暑氣
極盛陽明得時況因動而得之中暍明矣非甘辛大
寒之劑則不能瀉其暑熱墮浮溜之火而安神明也
遂以甘露散甘辛大寒瀉熱補氣加白茯苓以分陰
陽約重一兩冰水調灌漸漸省事而諸證悉去後慎
言語節飲食三日以參朮調中湯之劑增減服之理

正氣逾十日後方平復

內傷霍亂

戊午春攻襄陽回住夏曹州界有蒙古百戶昔良海
因食酒肉飲潼乳得霍亂吐瀉從朝至午精神昏憤
以困急來請予視之脉得浮數按之無力所傷之物
已出矣即以新汲水調桂苓白朮散徐徐服之稍安
又於墻陰掘地一穴約二尺許貯以新汲水在內攪
動一時澄定名曰地漿用清者一盞再調服之漸漸
氣調吐利遂止至夜安眠翌日微燥渴却以錢氏白
朮散時時服之良愈或問用地漿者何也予曰坤為
地地屬陰土平曰靜順感至陰之氣又於墻陰貯以
新水取重陰之氣也陰中之陰能瀉陽中之陽今霍

亂因暑熱內傷得之故痺論云陰氣者靜則神藏躁則消亡又加以暑熱七神迷亂非至陰之氣則不愈予用之者此也或曰內經福萬世之書豈不信然並寶鑑

醫說續編卷第七

醫說續編卷第八

痰飲門

論痰為病用藥主治法

崑山 周恭 輯

痰之為物在人身隨氣升降無處不到世所不知百病中多有兼此者世所不識而身之上中下結塊不紅不痛不作膿皆是痰注也問其平日好食何物吐下後用相制之藥消之二陳湯去痰散鬱一身痰都能管如要在下加下引藥要在上加上引藥故治痰用利藥過多如滾痰丸之類必致脾氣下虛則痰反易生而多矣不可不知濕痰用白木寒痰用夏熱痰用青黛黃食積痰用神麩麥諸消食積藥皆可用老

用連黃芩

食積痰用

神麩麥

諸消食積藥皆可用老

用連黃芩

用連黃芩

痰用

海石半夏瓜蒌
香附五倍子

痰在經絡中非吐不可出吐法

中就有發散之義痰在腸胃間可下而愈氣實痰熱
結吐難得出或塊或咯不出氣滯難治在膈上或膠
固稠濁者必用吐出之雖瀉亦不去凡實脾土燥脾
濕是治痰之本法又痰飲成窠囊用蒼朮行之極效
治法

留飲

子和曰昔人病留飲者數十年不愈予診之左手脉
三部皆微而小右手脉三部皆滑而大微小為寒滑
大為燥予以瓜蒂散涌其寒痰數升汗出如沃次以
導水禹功去腸中燥垢亦數升其人半愈然後以淡
劑流其餘蘊以降火之劑開其胃口不踰月而痊

風痰

常仲明之子自四歲得風痰疾至十五歲轉甚每月
發一兩次發必頭痛痛則擊數百拳出黃綠涎一兩
盞方已比年發益頻目見黑花發則昏不知人三四
日方省諸醫皆用南星半夏化痰之藥終無一效偶
遇戴人於灑水之南鄉戴人以雙解散發汗次以苦
劑吐痰病去八九續以分劑平調自春至秋如此數
次方獲全愈

寒痰聚腹如斗

一婦人心下臍上結硬如斗按之如石人皆作病胎
鍼灸毒藥禱祈無數如捕風然一日戴人見之曰此
寒痰診其兩手寸脉皆沉非寒痰而何以瓜蒂散吐

之連吐六七升其塊立消過半俟數日後再吐之其涎沫類雞黃腥臭特殊約二三升凡如此者三後以人參調中湯五苓散調之腹已平矣

停飲

一婦從年少時因大哭罷痛飲冰水困臥水停心下漸發痛悶醫氏咸以爲冷積治之以溫熱劑及禁食冷物一聞茶氣病輒內作如此數年燎針燒艾創孔數千十餘年後小便赤黃大便閉悶兩目加昏積水轉甚流於兩脇世謂水癖或謂支飲礪砂稜茂攻磨之藥竟施之矣食日衰積日茂上至鳩尾旁至兩脇及臍下但發之時按之如水聲心腹結硬手不可近向者發稀近者月作五七次甚則欲死諸藥皆厭二

十餘年求戴人發藥診其脉寸口獨沉而遲此胸中有痰先以瓜蒂散湧痰五七升不數日再越痰水及斗又數日上湧數升凡三湧三下汗如水者亦三其積皆去以流濕飲之藥調之月餘大瘥

並儒門事親

風痰治驗

參政楊公七旬有二宿有風痰於至元戊辰春忽患頭旋眼黑目不見物心神煩亂兀兀欲吐復不吐心中如懊懷之狀頭偏痛微腫面赤色腮頰亦赤色足脰冷命予治之予料之此少壯之時喜飲酒久積濕熱干內風痰內作上熱下寒是陽不得交通否之象也經云治熱以寒雖良工不敢廢其繩墨而更其道也然而病有遠近治有輕重參政今年高氣弱上熱

雖盛豈敢用寒涼之劑損其脾胃經云熱則疾之又云高巔之上射而取之予以三稜針約二十餘處刺之其血紫黑如露珠之狀少頃頭目便覺清利諸證悉減遂處方云眼黑頭旋虛風內作非天麻不能除天麻苗謂之定風草此草獨不爲風所搖故以爲君頭偏痛者乃少陽也非柴胡黃芩酒製不能治黃連苦寒酒炒以治上熱又爲因用故以爲臣橘皮苦辛溫炙甘草甘溫補中益氣爲佐生姜半夏辛溫能治風痰茯苓甘平利小便導濕熱引而下行故以爲使服之數服邪氣平生氣復而安矣明年春叅政除懷孟路揔管以古風一闕見贈云書生暮年私自憐百病交遘無由痊自知元氣不扶老肝木任縱心火燃

上炎下走不相制一身坐受陰陽偏一月十五疾一作一作數日情惘然心怦怦兮如危弦頭濛濛兮如風船去年臥病幾半載兩耳但覺鳴秋蟬羅君赴召來幽燕與我似有前生緣藥投涼冷恐傷氣聊以砭石加諸巔二十餘刺若風過但見鬱氣上突霏白煙胸懷洒落頭目爽塵空一濯清冷淵東垣老人醫中仙得君門下爲單傳振枯起怯入三昧倒生迴死居十全方今草野無遺賢姓名已達玉階前病瘳報君爲一賦欲使思邈相周旋青囊祕法不可惜要令衰朽終天年

寶鑑

痰熱項強

一男子項強不能迴顧動則微痛丹溪診其脉弦而

數實右手為甚作痰熱客太陽經以二陳湯加黃芩
羌活紅花服後二日方愈

醫案

過食滑膩成痰患

丹溪曰予事老母固有愧於古者然母年逾七旬素
多痰飲至此不作節養有道自謂有術只因大便燥
結時以新牛乳猪脂和糜粥中進之雖得暫時滑利
終是膩物積多次年夏時鬱為粘痰發為脇瘡連日
作楚寢興隕穫為之子者置身無地因此苦思而得
節養之說時進參朮等補胃補血之藥隨天令加減
遂得大府不燥面色瑩潔雖覺瘦弱終是無病老境
得安職此之由也因成一方用參朮為君牛膝芍藥
為臣陳皮茯苓為佐春加川芎夏加五味黃芩麥門

冬冬加當歸身倍生薑一日或一貼或二貼聽其小
水纔覺短少便進此藥小水之長如舊即是却病捷

法
格致
餘論

痰積胸痞一臂偏瘦

丘彥才平居苦胸中憤憤然頭目昏痛欲吐不吐忽
忽善忘時一臂偏瘦召櫻寧生視之當關以上脉濡
而滑按之沉而有力伯仁曰積飲滯痰橫於胸膈蓋
得之厚味醴酒肥膩煎炙蓄熱而生濕濕聚而痰涎
宿飲皆上甚也王冰云上甚不巳吐而奪之法當吐
候春日開明如法治之以物擦咽中須臾大吐異色
頑痰如膠飴者三四升一二日更吐之三四次則胸
中洞爽平復矣

白雲
集

治痰以橘皮為主

方勺字仁聲嘗著泊宅編論治痰當以橘皮為主須用真洞庭陳者其方去白取紅一觔甘草鹽各四兩水五椀慢火煮焙乾搗為細末點服又古方以橘紅四兩炙甘草一兩為末湯點名二賢湯以治痰極有驗世醫但知用半夏南星枳實茯苓之類何足以語此外舅莫強中服之腹痛利下物數塊如鐵彈子臭不可聞舊苦食後胸滿之疾豁然頓愈

吳仙丹

常子正中丞苦痰飲每啖冷食飽或晴陰節變率用十日一發頭疼背寒嘔吐酸汁即數日伏枕不食如千金大五飲丸之類皆不效宣和初為順昌司錄於

太守蔡公席上得此方服之遂不作每遇飲啖過多腹滿服五七丸不三兩時便旋已作吳茱萸氣酒飲隨小水而去前後痰藥甚衆無及此者方名吳仙丹用白茯苓吳茱萸湯炮去沫右等分為末煉蜜如梧桐子大每服三十九不拘時候熱水吞下酒飲亦可並集

痰氣怔忡

羅成之既得丹溪之學歸隱崇明三沙張太尉士誠患痰氣怔忡諸省醫治療不效迎成之診之主以倒倉法張卒用其方諸病悉除賜勞甚厚醫史

酒痰結腫

趙以德云予近治一男子肩井後腫痛身熱且嗽其

腫按之不堅此乃酒痰流結者遂用南星半夏瓜蒌
葛根芩連竹瀝作煎飲燒葱根燂腫上另用芥子白
礬作小丸就煎藥吞二十九須臾痰隨嗽出半日約
去三四椀病即愈藥要或問

咳嗽門

論嗽分四時并早晚治法

凡嗽春是春升之氣夏是火炎上最重秋是濕熱傷
肺冬是風寒外來用藥發散之後必以半夏逐去其
痰庶不再來也如上半日嗽多者屬胃中有火用貝母石
膏降午後嗽多者屬陰虛用四物湯加炒先降其火
五更嗽多者此胃中有食積至此時流入肺金以知母地
骨皮降肺黃昏嗽多者火氣浮於肺不宜用涼藥用
中之火

倍于五味子
斂而降之

論嗽分內外所因治法

風寒嗽者鼻塞聲重惡寒主行痰開腠理二陳湯加
麻黃杏仁
桔梗火嗽者有聲痰少面赤主降火清金化痰勞嗽
者盜汗出兼痰者多作寒熱主補陰清金四物湯
加姜汁竹瀝肺
脹嗽者動則喘滿氣息動主收斂用訶子青
黛杏仁痰嗽者
嗽動便有痰聲痰出主豁痰隨證加減嗽止五者大
槩明其是否而施治耳並治法

欵花治久嗽

有人病久嗽肺虛生寒熱以欵冬花焚三兩俟煙出
以筆管吸其煙滿口則嚥之至倦則已凡數日之間
五七作差衍義

膿血嗽

東門高三郎病嗽一年半耳鳴三月矣嗽膿血面多
黑黥身表俱熱喉中不能發聲戴人曰嗽之源心火
之勝也秋傷于濕冬生咳嗽冬水既王水濕相接隔
絕於心火火不下降反而炎上肺金被燠發而為嗽
金燠既久聲反不發醫者補肺腎皆非也戴人令先
備西瓜冰雪等物其次用涌泄之法又服去濕之藥
病日已矣

勞嗽咯血

灑陽劉氏一男子年二十餘歲病勞嗽咯血吐唾粘
臭不可聞秋冬少緩春夏則甚寒熱往來日晡發作
狀如瘡瘡寢汗如水累服麻黃根敗蒲扇止汗汗自

若也又服寧神散寧肺散止嗽嗽自若也戴人先以
獨聖散湧其痰痰狀如雞黃汗隨湧出昏憤三日不
省時時飲以凉水精神稍開飲食加進又與人參半
夏丸桂苓甘露散服之不輟數日乃愈

偶吐愈嗽

張坂村鹿子春一小兒七八歲夏月病嗽羸甚戴人
欲涌之子春以為兒幼弱懼其不勝少難之一日因
飲酒家人與之酒傷多乃大吐吐定而嗽止蓋酒味
苦苦屬涌劑子春乃大悟戴人之言是也

並儒門
事親

肺痿欬嗽

華嚴寺和上座代史侯出家年未四十至元四月間
因澡浴大汗出還寺剃頭傷風頭疼四肢困倦就市

中贖通聖散服之又發其汗頭疼少減次日復作又以通聖散發之發汗數四反添勞動喘促自汗惡風欬而有血懶於言語飲食減少求醫治之醫與藥多以生薑為引子至六月間精神愈困飲食加少形體羸瘦或欬或唾紅血極多扶而後起請予治之具說前由診其脉浮數七八至按之無力予曰不救矣或曰何謂不救內經曰血之與汗異名而同類奪汗者無血奪血者無汗金匱要畧云肺痿之病從何而得之師曰或從汗出又被快藥下利重亡津液故得之今肺氣已虛又以辛藥瀉之重虛其肺不死何待藏氣法時論曰肺欲收急食酸以收之用酸補之辛瀉之蓋不知內經之旨仲景云醫術淺狹懵然不知病

源為治乃悞發汗吐下之相反其禍至速世之士但務彼翕習之榮而莫見此傾危之敗惟明者居然能護其本近取諸身夫何遠之有焉其僧不數日果亡

寶鑑

喘嗽發塊

一膏梁婦人積嗽面青黃帶白爪路胷下有塊發即吐嗽而喘面足浮腫膨帶痰血此胃中清血因熱蒸而出瘦人大率不好貝母瓜蒌陳皮白朮木通茯苓生甘草香附南星山梔子黃芩知母青皮煎服治法

咳嗽惡風寒

一男子年五十餘患咳嗽惡風寒胸膈痞悶口稍乾心微痛兩手脉浮緊而數左大於右蓋表實裏虛問

其人平日嗜酒肉素有食積因行房又往來涉寒水且冒微雨又忍饑歸後繼以飽食酒肉而病丹溪先用參每貼四錢麻黃連根節二錢與三二貼嗽止惡風寒除於是改用厚朴枳實陳皮青皮瓜蒌半夏為丸與二十貼餘用人參湯送下痞滿亦安

勞倦作嗽

一男子三十五歲因連夜勞倦不得睡感一嗽疾痰如黃白膿嗽聲不出時初春大寒醫與小青龍湯四貼覺咽喉有絲血腥氣逆上遂吐血線自口中左邊出一條頃遂止如此每一晝夜十餘次診其脉弦大散弱左大為甚人倦而苦於嗽丹溪作勞倦感寒因強與甘草燥熱之劑以動其血不急治恐成肺痿遂

與人參黃芪當歸白朮為藥陳皮炙甘草生甘草不去節麻黃煎熟入藕汁與之兩日而病減嗽止却於前藥去麻黃又與四貼而血證除脉之散大未收斂人亦倦甚食少遂於前藥去藕汁加黃芩縮砂半夏至半月而安

痢後感寒嗽

盧兄年四十五歲日來大便下痢脉來遲澁面黃力倦者兩年六月因勞倦發熱已自服參蘇飲兩貼續早起小勞遇寒兩手與面背紫黑昏什少時却醒大發熱妄言口渴身痛至不可眠脉參伍不調微帶數重取虛豁左大於右丹溪以人參二錢半麻黃一錢黃耆一錢白朮二錢當歸半錢與五六貼得睡醒來

大汗如雨日後再發熱脇痛欬若睡時嗽不作而妄語且微惡寒診之脉似前而左畧緊此體虛再感寒又與前藥加半夏茯苓十貼再得大汗而安但身倦至不可久坐不思食用補中益氣湯中加神麩半夏縮砂至五七十貼而安

並醫案

肺氣焦滿痰嗽喘喝

陳伯英病肺氣焦滿滑伯仁視之口病得之多慾善飲且殫營慮中積痰涎外受風邪發即喘喝痰欬不能自安為製清肺泄滿降火潤燥苦辛等劑服之既安衆詰之曰是出何方書名何散飲伯仁應之曰是為混沌湯聞者皆大笑曰混沌湯有用也

白雲集

諸氣門

附癩疔

氣出不絕聲

有男子忽氣出不絕聲病數日矣王叔權以手按其臆中而應微以冷針頻頻刺之而愈初不之灸何其神也

資生經

血氣刺痛

陳良甫嘗治一婦人血氣作苦如一小盤樣走注刺痛要一人伏定方少止用葱白散烏雞丸二藥而愈尋常小人血氣用此二藥亦有奇效 陳宜人病血氣作楚痛不可忍服諸藥無效召良甫診之兩關脉沉弱為肝脉差緊此血氣漸成痲痺也只以前二藥安愈四明馬朝奉後院亦病此用此二藥而愈

氣痛

鄧安八年五十忽然氣痛投神保丸愈不一二日再痛再服神保丸六七十粒大腑不通其疾轉甚亦有用沉香木香薑桂等藥而未敢投痛甚則築心築背築定兩脇似有兩柴十字挿定心脇叫聲徹天召良甫診之六脉沉伏乍來乍去衆問良甫診脉吉凶何如答曰夫九痛之脉不可準也但以證辯用藥觀其人質肥偉問其大腑數日不通良甫曰實痛也其腹必脹但以人按之痛甚手不可向近此大實也經曰大滿大實者可下之用替針丸五六百粒是夜即愈

並良方

勞苦病氣逆

子和曰昔予治一書生勞若太過大便結燥欬逆上

氣時喝喝然有音唾嘔鮮血予以苦劑解毒黃連湯加木香漢防已煎服時時啜之復以木香檳榔丸泄其逆氣不月餘而痊

儒門事親

灸偏墜

舍弟少戲舉重得偏墜之疾有客人爲當關元兩旁相去各三寸青脉上灸七壯即愈王彥賓患小腸氣灸之亦愈

資生經

卒疝暴痛

項關一男子病卒疝暴痛不任倒於街衢人莫能動呼戴人救之戴人引經證之邪氣客于足厥陰之絡令人卒疝故病陰丸痛也戴人急瀉大敦二穴大痛立已夫大敦穴者乃足厥陰之二穴也

傷冷物囊腫

殄寇鎮一夫病瘖瘡發渴痛飲蜜漿劇傷冰水醫者莫知瀉去其濕反雜進姜附濕為燥熱所壅三焦閉溢水道不行陰道不興陰囊腫墜大於升斗戴人先以導水百餘丸少頃以猪腎散投之是夜瀉青赤水一斗遂失痛之所在

寒疝 亦名水疝

一僧病疝發作冷氣上貫齒下貫腎緊若繩挽兩辜時腫而冷戴人診其兩手脉細而弱斷之曰此秋脉也因金氣在上下伐肝木木畏金抑而不伸故病如是肝氣壅滯不能下榮於辜丸故其寒實非寒也木受金制傳之胃土胃為陽明故上貫齒病非齒之病

肝木者心火之母也母既不伸子亦屈伏故下冷而水化承之經曰木鬱則達之土鬱則泄之令湧泄四次果覺氣和辜丸痒而暖戴人曰氣已入辜中矣以茴香木茂之藥使常服之首尾一月而愈

並儒門事親

久疝

癸丑歲予奉詔至六盤山上命治火兒赤紐隣夕病疝氣復因七月間饑飽勞役過飲潼乳所發甚如初面色青黃不澤臍腹陣痛搗撮不可忍腰曲不能伸熱物熨之稍緩脉得細小而急于思難經云任之為病男子內結七疝皆積寒於小腸之間所致也非大熱之劑即不能愈遂制一方名之曰沉香桂附丸間服天台烏藥散服此二藥旬日良愈明秋王征班師

遂遠迎拜精神如故上大悅輒錄于此

女人病疝

趙運使夫人年五十八歲於至元甲戌三月中病臍腹冷疼相引脇下痛不可忍反復悶亂不得安臥予以當歸四逆湯主之先灸中庭穴

並寶鑑

疝痛心疼

一人疝痛心疼丹溪以山梔炒香附一兩蒼朮神麩麥芽半兩半夏七錢石碱三錢桂枝一錢半春月去之右為末炊餅丸菘豆大每服百丸姜汁鹽湯下

治法

氣發臍下為肝疝證

臨安縣陳元善病氣發則臍下築築漸上至心下嘔涌痛懣手足清喉中淫淫而痒眉本疼痠目不欲視

頭不欲舉神昏昏欲睡而不寐惡食氣舉丸控引小便數而欠年未三十疝瘡若衰老人劣劣不自持滑伯仁視其脉沉弦而澁曰是得之憂鬱憤怒寒濕風雨乘之為肝疝也屬在厥陰故當脉所過處皆病焉厥陰肝也張從政云諸疝皆屬肝素問云肝欲散亟食辛以散之遂取吳茱萸佐以薑桂及治氣引經藥兼製茴練等丸每十日一溫利之三月病瘳

寒疝脇疼心脹

魏士圭妻徐病寒為疝自臍下上至心皆脹滿攻痛而脇疼尤甚嘔吐煩悶不進食飲伯仁視之脉兩手沉結不調曰此由寒在下焦宜亟攻其下無攻其上為灸章門氣海中脘服玄胡桂椒佐以藁木諸香荻

芩青皮等十日一服溫利丸藥聚而散之也士圭守其法治之果效並白雲集

灸疝氣偏墜

鄭亨老病疝灸之得效其法以淨草一條茅及麥稈尤妙度患人口兩角為一則摺斷如此三則摺成三角如△字樣以一角安臍中心兩角在臍之下兩傍尖盡處是穴若患在左即灸右在右即灸左兩邊俱患即兩穴皆灸艾炷如麥粒大灸十四壯或二十一壯即安也

奪命丹

奪命丹治遠年近日小腸疝氣偏墜搐疼臍下撮痛以致悶亂及外腎腫硬日漸滋長陰間濕痒抓成瘡

悉治之吳茱萸一觔去枝梗四兩酒浸四兩醋浸四兩湯浸四兩童子小便浸各一

宿同焙乾澤瀉二兩去灰右為細末酒煮麵糊為丸如梧

桐子大每服五十九丸空心食前鹽湯或酒下神妙不

可具述馮仲柔云頃年某倉使家傳因令局中合賣

紹熙壬子冬予親曾得效時苦奔狔寒氣攻衝小腹

引痛四日只一服臍府微動痛苦失去遂安一方名

星斗丸湯浸者用鹽水浸澤瀉用四兩切作麤片酒

浸一宿是齋方

橘芋動癩氣

余壯年啖柑橘過多積成飲癖左右肋下隱隱然不敢復啖數年矣一日山行大勞饑渴甚遇橘芋食之橘動舊積芋復滯氣即時右丸腫大寒熱交作因而

思之脾肺皆主右故積飲滯氣下陷太陰陽明之經
初俱傷其邪從而入于囊中著在畢九筋膜而為腫
脹張戴人有言病分上下治雖是木鬱為疝在下則
不可吐亦當從下引而竭之竊念病有不同治可同
乎今以饑勞傷脾脾氣下陷必升舉之則胃氣不復
下陷積可行若用藥下之恐重陷胃氣也先服調胃
一二貼次早注神使氣至下焦嘔逆而上覺助下積
動到中焦則吐而出之吐後癩腫減半次早復吐吐
後和胃氣疎通經絡二三日愈凡用此法治酒傷與
飲水注右丸腫者皆效

飲水癩痛

一人病後飲水患左丸痛甚灸大敦適摩腰膏內用

烏附丁麝者將以摩其囊上抵橫骨端灸後溫帛覆
之痛即止一宿腫亦消矣並藥要或問

噎膈門

論反胃有四并脉法

戴氏云翻胃病有四有血虛有氣虛有熱有痰夫血
虛者脉必數而無力氣虛者脉必緩而沉氣血俱虛
者則口中多出沫但見大便秘出者必死有熱者脉必
數而有力有痰者脉滑數二者可治血虛者四物為
主氣虛者四君子為主熱者解毒為主痰者二陳湯
為主

反胃宜灸

有人久患反胃予與鎮靈丹服更令服七氣湯遂能

立食若加以炷艾尤佳有老婦患反胃飲食至晚即吐出見其氣遠臍而轉予為點水分氣海并夾臍邊兩穴他醫只灸水分氣海即愈神效資生經

中滿膈食

遂平李官人妻病咽中如物塞食不下中滿他醫治之不效戴人診其脉曰此痰膈也內經曰三陽結為膈王啓玄又曰格陽云陽盛之極故食格拒而不入先以通經散越其一半後以舟車丸下之三次食已下又以瓜蒂散再越之徒啖如昔日矣儒門事親

噎病生於血乾

丹溪曰張雞峯云噎當是神思間病惟內觀自養可以治之此言深中病情而施治之法亦為近理夫噎

病生於血乾血陰氣也陰主靜內外兩靜則藏府之火不起而金水二氣有養陰血自生腸胃津潤傳化合宜何噎之有因觸類而長曾製一方治中年婦人翻胃以四物湯加和白陳皮雷尖桃仁生甘草酒紅花濃煎入驢屎飲以防其或生蟲也與數十貼安發揮反胃為精血耗竭所致

台州一木匠年近三十勤於工作而有艾妻且喜酒其面白病翻胃半載其脉澁而不勻重則大而無力大便八九日一行皆燥結如羊屎至甚瘦弱無力先與甘蔗汁煎六君子湯加大黃附子與之候大便稍潤令謝去工作臥於牛家取新温牛乳細細呷之每頓盡一杯一晝夜五七次盡却食物以漸而至八九

次半月大便潤如此兩月而安餘論

服金石致反胃

杭州一男子年四十餘患反胃兩月矣口乾不喜飲食有時吐或不吐吐則涎裹物而出吐後胸膈方快診其脉俱澁重則茲大蓋其壯年多食金石房中藥所致時正秋尚熱遂令其多作竹瀝煮米粥以代粥飲每一二啜而止却帶温頻頻與之自此不吐至旬日稍涼以流水作稀粥入少竹瀝與之令以四物湯加陳皮益其血月餘而安

胃口鬱血物下屈曲

王仲延每食物必屈曲下膈梗澁微痛脉右甚澀而關尤沉左脉和此汚血在胃口氣鬱而成痰皆食之

所為也令試思之曰去年臘月每早必飲點剝酒逼寒之所致遂教以韭汁每半盞令冷飲細細呷之盡韭汁一斤而安

反胃脉

反胃脉血虛左手脉無力氣虛右手脉無力有痰寸關脉沉或伏而大有氣結開滯通氣之藥皆可寸關脉必瀦並治法

反胃有聲

一男子壯年食後必吐出數口却不盡出膈上時作聲而已如平人病不在脾胃而在膈間問其得病之由乃因大怒未止輒喫麵即有此證蓋怒甚則血鬱于上積在膈間有碍氣之升降津液因聚為痰為飲

與血相搏而動故作聲也用二陳湯加香附韭汁菜
菔子服二日以瓜蒂散酸漿吐之再一日又吐痰中
見血一盞次日復吐見血一鍾其病即愈

跌撲反胃

一中年婦人中脘作痛食已乃吐面紫霜色兩關脉
澀知其血病也問之乃云跌仆後中脘痛投以生新
推陳血劑吐血片椀許則痛不作而食亦不出矣
藥要
或問

反胃不治證

浙省平章南征閩粵還病反胃醫以為可治朱先生
診其脉告曰公之病不可言也即出獨告其左右曰
此病得之驚後而使內火木之邪相挾氣傷液亡腸

胃枯損食雖入而不化食既不化五藏皆無所稟去
此十日死果如言

越遊
集

隔日吐食屬下焦寒

丁敬中母病反胃每隔夜食飲至明日中晷皆出不
消化他醫以暖胃之藥悉試之罔效敬中詣滑伯仁
言固請往視之脉在肌肉之下甚微而弱伯仁揆衆
醫用藥無遠於病何至不效心歉然未決一日讀東
垣書謂吐有三證氣積寒也上焦吐者從於氣中焦
從於積下焦從於寒其脉沉而遲朝食暮吐暮食朝
吐小溲利大便秘為下焦吐也法當通其秘溫其寒
氣復以中焦藥和之伯仁得此說而喜起嘆曰其合
於王母之證歟但王母大便不秘遂再往視專治下

焦散寒以茱萸茴香爲君丁桂半夏爲佐服至二三
十劑而飲食晏然伯仁曰經不云乎寒淫所勝平以
辛熱其是之謂歟白雲集

按王太僕曰食不得入是有火也食入反出是無
火也與此同意以其在上者則食已而暴吐在下
者則食久而始吐久暴之間所以爲上下焦陰陽
寒熱之別脉有大小之分也
諸虛門

氣虛灸氣海

柳公度言吾養生無他術但不使元氣佐喜怒使氣
海常溫耳今人既不能不以元氣佐喜怒矣若能時
灸氣海使溫亦其次也予舊多病常苦氣短醫者教

灸氣海氣遂不促自是每歲湏一二次灸之以氣怯
故也資生經

虛勞

西華束茂之病虛勞寢汗面有青黃色自膝以下冷
痛無汗腹中燥熱醫以薑附補之五晦朔不令飲水
又禁梳頭作寒治之請于戴人戴人曰子之病不難
愈難於將護恐愈後陰道轉茂子必不慎束生曰不
敢戴人先以舟車丸瀉川散下五七行心火下降覺
渴與冰水飲之又令澡浴數日間面紅而澤後以河
水煮粥溫養脾胃河水能利小溲又以活血當歸丸
人參柴胡散五苓散木香白朮散調之病大差寢汗
皆止兩足日暖食日進戴人常曰此本肺痺當以涼

劑蓋水之一物在目爲淚在皮爲汗在下爲小溲穀多水少爲常無水可乎若禁飲水必內竭內竭則燥熱生焉人若不渴與水亦不肯飲之矣束生旣愈果忘其戒病復作戴人已去乃殂

儒門事親

虛中有熱治驗

建康道按察副使奧屯周卿子年二十有三至元戊寅三月間病發熱肌肉消瘦四肢困倦嗜臥盜汗大便溏多腸鳴不思飲食舌不知味懶言語時來時去約半載餘請予治之診其脉浮數按之無力正應王仲和脉歌云藏中積冷榮中熱欲得生精要補虛先灸中脘乃胃之紀也使引清氣上行肥腠理又灸氣海乃生發元氣滋榮百脉長養肌肉又灸三里乃胃

之合穴亦助胃氣撤上熱使下於陰分以甘寒之劑瀉熱火佐以甘溫養其中氣又食粳米羊肉之類固其胃氣戒以慎言語節飲食懲忿窒慾病氣日減數月病得平復逮二年肥盛倍常或曰世醫治虛勞病多用苦寒之劑君用甘寒之藥羊肉助發熱人皆忌之今食羊肉粳米之類請詳析之予曰內經云火位之主其瀉以甘藏氣法時論云心苦緩急食酸以收之以甘瀉之瀉熱補氣非甘寒不可若以苦寒以瀉其上使脾土愈虛火邪愈盛又云形不足者溫之以氣精不足者補之以味勞者溫之損者益之十劑云補可去弱人參羊肉之屬是也先師亦曰人參能補氣虛羊肉能補血虛虛損之病食羊肉之類何不可

之有或者嘆曰潔古之學有自來矣寶鑑

氣虛吐痰

丹溪曰一男子七十九歲頭目昏而重手足無力吐痰口口相續左手脉散大而緩右手脉緩而大不及於左重按皆無力飲食稍減而微渴大便三四日一行衆人皆與風藥予曰若果為風藥至春深必死此大虛證當以補藥作大劑服之衆怒而去予教以黃芪人參當歸身芍藥白朮陳皮濃煎作湯使下連栢丸三十粒服一年半而精力如少壯時連栢丸冬加乾薑少許作令藥餘三時皆依本法連栢皆以姜汁炒為末用薑汁糊丸醫案

虛證挾痰有似邪祟

血氣者身之神也神既衰乏邪因而入理或有之若夫血氣俱虧痰客中焦妨礙升降不得運用以致十二官各失其職視聽言動皆有虛妄以邪治之焉能愈病憲幕傅兄之子年十七暑月因勞而渴恣飲梅漿又連得大驚三四次妄言妄見病似邪鬼兩脉皆虛弦沉數予曰數為有熱虛弦是大驚又酸漿停於中脘補虛清熱導去痰滯病乃可安與人參白朮陳皮茯苓黃芩黃連等濃作湯入竹瀝薑汁與淡旬未效衆皆尤藥之未對予知其虛之未回痰之未導仍與前藥加荆瀝又旬餘而安外弟一日醉飽後亂言妄見且言伊兄生前事甚的乃叔叱之曰食魚肉與酒太過痰所為耳灌鹽湯一大椀吐痰一升許汗因

大作困睡一宵而安又金氏婦壯年暑月赴筵回乃姑詢其坐次失序自愧因成病言語失倫其中又時間一句曰奴奴不是兩脉皆弦而數予曰非鬼神乃病也但與補脾導痰清熱數日自安其弟不信以邀巫者噴水而呪之旬餘而死或曰病無鬼以邪治之何至於死曰暑月赴筵外境蒸熱辛辣適口內境鬱熱而況舊有痰積加之愧悶其痰與熱何可云喻今乃驚以法只是驚其神而血不寧也噴以法水是冷密其肌汗不得泄也汗不得泄則熱內燔血不得寧則陰消而陽不能獨立也不死何待或曰外臺祕要有禁呪一科庸可廢乎予曰移精變氣乃小術耳不治小病若內有虛邪外有實邪自有定法符何能也

惟符水可治膈上熱痰一呷涼冷豈不清快若內傷而虛與冬令嚴寒符水入口必冰胃而死斯言可與

識者道餘論

癆瘵門

剪草治療

草狀如茜草
又如細辛

有一貴人其國封病瘵其尊人嘗以一方畀之九日而藥成前一夕病者夢人戒令翌日勿亂服藥次日將服之為屋土墜器中不可服再合既成又將服之為鼠覆器又不得食又再合未就而夫人卒矣此藥之異如此其方以剪草一斤淨洗為末入生蜜一斤和為膏以器皿盛之不得犯鐵器九蒸九曝日一蒸曝病人五更起面東坐不得語以匙抄藥如粥服之

每服四兩服已良久用稀粟米飲壓之藥冷服粥飲亦不可太熱或吐或下皆不妨如久病肺損咯血只一服愈尋常咳嗽血妄行每服一匙可也草本

熏勞法

貴公在蜀作宣撫甚秘寶此法以膏肓之疾藥不能及熏之即效此方治咳嗽發熱骨蒸不已好雄黃三錢茜草二錢款花二錢玄參三錢百部三錢艾葉一錢雌黃半錢雷丸厚朴作末以香爐有蓋者封固止留一小孔出煙患人以紙塞鼻以口吸其煙久則飲少清米飲日三次虫死嗽愈一方加百部蕪荑仁蘇木熔黃蠟和攤紙上方錄

明月丹治勞

沈存中云威愍孫元規藏此方數能活人江陰萬融病勞四體如焚垂困一夜夢人腹擁一月如大盤明爛不可正視逼人心骨皆寒已而悸悟俄頃叩關乃威愍使人遺之藥服之遂瘥問其名則明月丹也始悟向之所夢大抵此藥最治熱勞又云傷寒煩躁骨熱皆能治療良方

療疾灸膏肓

葉餘慶字元善平江人自云嘗病療疾其居對橋而行不能度有僧爲之灸膏肓穴得百壯後二日即能行數里登降皆不倦自是康強其取穴法但並足垂手正身直立勿令俯仰取第四椎下兩旁同身寸各三寸灸時以軟物枕頭覆面臥垂手附身或臨時置

身取安便而已其轉為人灸亦用此法云針灸四書

傳屍勞瘵

有人傳屍勞瘵寒熱交攻久嗽咯血日見羸瘦先以三拘湯蓮心散煎萬不失一

倒倉法治勞嗽

臨海林兄久嗽吐紅發熱消瘦衆以為瘵百方不應請予視之脉兩手弦數日輕夜重計無所出以倒倉法而安時冬月也第二年得一子並治法

傳屍勞虫

昔人嘗與病勞婦人交婦人死遂得疾遇異人云勞氣已入藏急令服神授散二觔其病當去如其言服之幾盡大便出一虫狀如蛇遂安續有人服之獲安

濟者多矣其法用川椒二觔擇去子并合口者炒出汗右為末每服三錢空心米湯調下須暈悶少頃如不能禁即以酒糊丸如梧桐子大空心服三五十九危氏方

偶噫勞虫

有人患勞瘵兩年諸藥不效一日無肉味其腹痛不可忍又恐傳染移在空房候其自終經停三日病者腹痛氣息將絕思憶肉味之急忽有人惠雞子三枚其病人俛仰取火低頭取瓦銚煎熟吹火屢然屢滅鼻中如有所礙將熟間忽噫噴一聲有紅線一條自鼻中出牽抽約二尺長趨下瓦銚中病人知是怪物急用椀覆煎銚中盡力燒火不住其銚欲裂方住火

開鏡視之乃是小虫一條頭目皆具已煨死如鐵線
樣即以示其家人後棄之於江其病即安

見上

脾胃門

脾胃虛損誤下戒

戊申六月初樞判白文舉年六十二素有脾胃虛損
病目疾時作身面目睛俱黃小便或黃或白大便不
調飲食減少氣短上氣怠惰嗜臥四肢不收至六月
中目疾復作醫以瀉肝散下數行而前疾增劇予謂
大黃牽牛雖除濕熱而不能走經絡下咽不入肝經
先入胃中大黃苦寒重虛其胃牽牛其味至辛能瀉
氣重虛肺本嗽大作蓋標實不去本虛愈甚加之適
當暑雨之際素有黃證之人所以增劇也此當於脾

胃肺之本藏瀉外經中之濕熱製清神益氣湯主之
而愈 范天驥之內素有脾胃之證時顯煩躁胸中
不利大便不通初冬出外而晚歸為寒氣怫鬱悶亂
大作火不得伸故也醫疑有熱治以疎風丸大便秘
而病不減又疑藥力小復加七八九下兩行前證
仍不減復添吐逆食不能停痰唾稠粘湧出不止眼
黑頭旋惡心煩悶氣短上喘無力不欲言心神顛倒
兀兀不止目不敢開如在風雲中頭苦痛如裂身重
如山四肢厥冷不得安臥予謂前證乃胃氣已損復
下兩次則重虛其胃而痰厥頭痛作矣製半夏白朮
天麻湯主之而愈

脾胃虛弱

戊申有一貧士七月中病脾胃虛弱氣促憔悴因與人參芍藥湯既愈繼而冬居曠室臥熱炕而吐血數次東垣謂此人久虛弱臍有形而大熱在內上氣不足陽氣外虛當補表之陽氣瀉裏之虛熱冬居曠室衣服單薄是重虛其陽表有大寒壅遏裏熱火邪不得舒伸故血出於口因思仲景太陽傷寒當以麻黃湯發汗而不與之遂成衄血却與之立愈與此甚同因與麻黃人參芍藥湯

並脾胃論

瀉火傷胃

經歷晉才卿膏梁而嗜飲至春病衄醫曰諸見血者為熱以清涼飲子投之即止越數日其疾復作醫又曰藥不勝病故也遂投黃連解毒湯既而或止止而

復作易醫數四皆用苦寒之劑俱欲勝其熱而已然終不愈而飲食起居浸不及初肌寒而時躁言語無聲口氣臭穢惡如冷風然其衄之餘波則未絕也或曰諸見血者熱衄熱也熱而寒之理也今不惟不愈而反害之何哉內經曰以平為期又言下工不可不慎也彼惟知見血為熱而以苦寒攻之抑不知苦瀉土土脾胃也脾胃人之所以為本者今火為病而瀉其上火固未嘗除而土已病矣土病則胃虛胃虛則榮氣不能滋榮百脉元氣不循天度氣隨陰化而無聲肌故寒也噫粗工嘻嘻以為可治熱病未已寒病復起此之謂也

中氣不足治驗

伏菴劉尚書第五子太常少卿叔謙之內李氏中統三年春欲歸寧父母不得情動於中又因勞役四肢困倦躁熱惡寒時作疼痛不欲食食即嘔吐氣弱短促怠惰嗜臥醫作傷寒治之解表發汗次日傳變又以大小柴胡之類治之至十餘日後病證愈劇主家云前藥無效莫非他病否醫曰此傷寒六經傳變至再經傳盡當得汗而愈翌日見爪甲微青黑色足脛至腰如冰冷目上視而睛不轉睛咽嗑不利小腹冷氣上衝心而痛嘔吐不止氣息欲絕召余視之余診其脉沉細而微不見傷寒之證此乃中氣不足妄作傷寒治之發表攻裏中氣愈損壞證明矣太夫人泣下避席曰病固危困君盡心救治予以辛熱之藥咬

咀一兩作一服至夜藥熟而不能飲續續灌下一口飲至半夜稍有呻吟之聲身體漸溫忽索粥飲至旦食粥兩次又煎一服投之至日高衆醫皆至診之曰脉生證回矣衆喜而退後越三日太夫人曰病人大便不利或以用脾約丸潤之可乎予曰前證用大辛熱之劑陽生陰退而愈若以大黃之劑下之恐寒不協轉生他證衆以爲不然遂用脾約丸二十九丸潤之至夜下利兩行翌日面色微青精神困弱嘔吐復作予再以辛熱前藥溫之而愈名曰溫中益氣湯

肝勝乘脾

真定路總管劉仲美年踰六旬宿有脾胃虛寒之證至元辛巳閏八月初天氣陰寒因官事勞役渴而飲

冷夜半自利兩行平旦召予診視其脉弦細而微四肢冷手心寒唇舌皆有褐色腹中微痛氣短而不思飲食予思內經云色青者肝也肝屬木唇者脾也脾屬土木來尅土故青色見于唇也舌者心之苗水挾木勢制火凌脾故青見于舌也難經有云見肝之病則知肝當傳之脾故先實其脾氣今脾已受肝之邪矣潔古先師云假令五藏勝各刑已勝補不勝而瀉其勝重實其不勝微瀉其勝而以黃耆建中湯加芍藥附子主之且芍藥味酸瀉其肝木微瀉其勝黃耆甘草甘溫補其脾土是重實其不勝桂附辛熱瀉其寒水又助陽退陰飴糖甘溫補脾之不足脾苦急急食甘以緩之生姜大棗辛甘大溫生發脾胃升騰之

氣行其榮衛又能緩其急每服一兩依法水煎服之
再服而愈

寶鑑

大正十一年

